

տուֆիններից յետոյ, եւ այդ ակեյի ոգեւորում էր նրան, ակեյի ուժ եւ կեանք էր տալիս նրա ձանին:

Ես առաջին անգամ տեսնում էի մի այդպիսի ուրախ հասարակութիւն: Ինձ թւում էր, որ սպանիչ հոգսը, վիշտը, տառապանքը, որ այդ կողմերում ամեն մի գիւղացու ճակատագիրն էր, երբեք այդ գիւղին չէր մօտեցել: Ինչո՞վ ձեռք բերեցին նրանք այդ ուրախութիւնը: Ինչո՞վ հեռացրին իրանցից անանդական լացը, կոծը ու արտասուքը: Ես այդ քննութիւնների մէջ չէի մտնում. ես միտնալուսում էի միայն, որ ամեն տեղ միշտ թշուառութիւններ տեսնելուց յետոյ վերջապէս տեսնում էի մարդիկ, որ աշխատում են, գործում են եւ իրանց աշխատութեան արդիւնքը ամենայն բաւականութեամբ վայելում են: Անգութ հարկահանը ծախել չէր տալիս նրա արօրի եզները, իսկ քուրդ ելուզակը չէր յափշտակում նրա անասունների հօտերը:

Ռեսը եւ նրա մօտ նստողները, որ մինչեւ այժմ նկատողութիւններ էին անում անասունների վրայ, այժմ սկսեցին նկատողութիւններ անել դաշտից վերադարձող մշակների վրայ:

– Այդ Զակօի տղան, ասում են, գժութիւններ շատ է անում, նրա ականջները պէտք է փոքր-ինչ ոլորել, – ասաց ռեսը, ցոյց տալով մի սրիկայադէմ պատանի, որը, իր գլխի քլուզի վրայ փաթաթած գոյնզգոյն թաշկիւնակների մէջ զանազան ծաղիկներ խրած, մեր մօտից հպարտութեամբ անցնում էր:

– Մեզանից ո՞ր մէկը նրա հասակում գժութիւններ չէ արել, – ներողամտութեամբ պատասխանեց քահանան: – Դեռ ջահիլ է, արիւնը նոր է եփ գալիս, կը մեծանայ, խելքը գլուխը կը գայ:

– Այդ Վանեսի տղան, ասում են, գործի չէ գնում. այս առաւօտ հայրը գօռով է դաշտը ուղարկել, – դարձեալ նկատեց ռեսը:

– Նա փոքր-ինչ ծոյլ է, – վկայեցին ամենքը:

– Նա գոնէ թող օրինակ առնէ Մաթոսի տղայից, որ տասն հոգու հաւասար է. մի օրոյ մէջ, որքան ասէք, հնձում է: Նայեցէք, ամբողջ օրը աշխատել է, հիմա մի մեծ շալակ խոտ է բերում հորթերի համար:

– Թող աստծոյ աչքը վրան լինի, շատ աշխատասէր տղայ է, – ձայն տոեցին ամենքը:

Այսպէս, մէկի արժանաւորութիւնները գովելով, միւսի թերութիւնները պախարակելով, բարոյականութեան այդ վերահսկողները իրանց կարծիքը յայտնում էին իւրաքանչիւրի մասին: Ի հարկէ, միւս օրը նրանք կը լսէին, լաւերը ակեյի կը խրախուստէին, իսկ վատերը կուղղէին իրանց վարքը: Յար-